

Odgovornost kantonalnih vlasti za nužni smještaj

OHR, OSCE i UNHCR pozivaju kantonalna ministarstva da istraže načine na koje mogu osigurati nužni smještaj porodicama koje to trebaju, npr. putem plaćanja stanarina itd., kako bi se podmirile rastuće potrebe za ovakvom vrstom smještaja. Prema Zakonu o raseljenim licima i izbjeglicama, svaki kanton je odgovoran za osiguravanje nužnog smještaja raseljenim licima koja su deložirana iz imovine za koju se smatra da je nelegalno nastanjuju. Prema zakonu, ove se odredbe odnose na raseljena lica koje nelegalno zauzimaju imovinu, a sada su deložirana i nisu u stanju sama sebi osigurati smještaj.

U Hercegovačko-neretvanskom kantonu, uprkos ponavljanim zahtjevima međunarodne zajednice vrlo je malo dosada urađeno od strane Kantonalnog ministarstva gradnje, urbanizma i zaštite okoliša, i Kantonalnog ministarstva zdravstva, rada i socijalne skrbi po tom pitanju. Prema odredbama kantonalnog budžeta za 2001. godinu, koji je konačno i usvojen prošlog mjeseca, 200.000 KM je namijenjeno "alternativnom smještaju / obnovi" pod Ministarstvom gradnje, urbanizma i zaštite okoliša, i 732.000 KM "skrbi o izbjeglicama i raseljenim licima" pod Ministarstvom zdravstva, rada i socijalne skrbi.

Međutim, niti jedno Ministarstvo nije u stanju izložiti plan o tome kako će ovaj novac biti iskorišten prije kraja godine, kako bi se podmirile potrebe nužnog smještaja.

Međunarodna je zajednica nebrojeno puta pozivala i pokušavala uticati na kantonalne vlasti da podmire svoje obaveze u osiguravanju nužnog smještaja, međutim, nikakve akcije nisu poduzete po tom pitanju. Zakon se mora poštovati i deložacije se moraju izvršiti. Stoga, pitanje je, šta će Vlada Hercegovačko-neretvanskog kantona napraviti kako bi osigurala smještaj onim osobama koje imaju pravo na nužni smještaj.

OHR, OEES i UNHCR predlažu da ona raseljena lica koja nelegalno zauzimaju tuđu imovinu, a nalaze se pred deložacijom, sada zapitaju Vladu Hercegovačko-neretvanskog kantona kako namjerava utrošiti ovaj novac koji se nalazi u budžetu za podmirivanje njihovih potreba za smještajem. Ove međunarodne organizacije očekuju da kantonalne vlasti u potpunosti ispune svoje zakonske obaveze.